

安
南
雜
記

李仙根 著

中
華
書
局

安南雜記

此據學海類編本
排印初編各叢書
僅有此本

安南雜記

清 遂甯李仙根子靜著

交趾之地卽安南。卽交州。卽日南。西北自交岡來。故曰交趾。東北界廣西。東界廣東。西界雲南。西南界老撾。卽古哀牢。南插入大海。中通占城。秦漢時皆郡縣也。黎氏王國在富良江西後三峰山左。安子山右。傘圓山插入雲霄。富良江左右纏抱。前入大海。亦南荒一都會也。所屬有十三道五十二府二百一十九州縣。都統莫氏。惟高平一府四州。在北隅之東。俱無城郭。其人被髮。以香蠟梳之。故不散。跣足。足無塵垢。以地皆淨沙也。男女衣皆大領。無分別。無裙庫。女有無摺圍裙。其王與官或時冠帶鞞。然非其好也。稱其貴人曰翁茶翁茶者。大官也。其牛羊豬。燒去毛。卽割而食之。只有燒酒。時刻喫檳榔。惟睡夢方停嚼耳。每用藥物塗其齒。黑而有光。見人齒白者。反笑之。惟王宮用黃瓦。官民不敢用瓦。以草苫。檳棟以竹。房檐高四尺許。門高不過三尺。俛首折腰。乃得出入。卽王殿檐高不過丈許。其屋外多種刺竹。甘蔗椰子諸樹。其果四時生長無定。其氣候常煖。其土產惟稻。無二麥。有布。最纖輕。有蠶桑絲紬。曰交兌素絹。如畫絹。闊二尺。多榕樹柑橘。有波羅密。果如南瓜。味微甜。中有子如刀豆子。皆可食。其象牙香藥。蘇花胡椒茴香醬醋等物。皆自外來者。無桌椅。特爲使臣造二公座。甚高大。其宴桌。圓彩金漆。高可尺許。絃似花瓣。其文字與中土同。另作數十字。多加士傍。與使臣往復文書不用也。臨賀公館在富良江之東。去國二十里許。以竹

爲牆。每天使至一次。則加竹一重。其風俗。嬌蕩無恥。洗浴便溺。男女裸體。往來坐立。不相迴避。雖貴家亦然。其豪家稍有牀褥。平民則無。貴者以網爲兜。兩人擡之。大貴者有轎似車。上轎盤腳坐。或用八人四人擡之。最可笑者。其王傘扇轎夫。全體俱露。止用一股青布纏腰。從尻下裹勒至臍。雖寒天不著寸衣。又皆形狀肥實。名曰好漢。聞多係殺人援赦者。其兵止穿大袖青衣一件。或二件。天暑即裸。并無甲冑。其器械尙銃藤牌鎗刀諸物。頗精于飾。以之。大用。殆不足也。頗讀書。知文字。而好怪異。無傳授。不甚貫通。尙巫鬼。不奉二氏之教。以能強言者爲功。故。有四字批評曰。愚曰疑曰詐曰傲。愚則不認理。疑則不信人言。詐則其言不可信。傲則自謂無罪也。此四字如銅牆鐵壁。牢不可破。要在廟堂勝算。各邊臣措置威風。有以警之耳。